



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
O USLOVIMA I NAČINU DODJELE
„ŠESTOAPRILSKE NAGRADE GRADA SARAJEVA“
(Prijedlog)

Predlagač: Gradonačelnica
Obrađivač: Stručna služba za poslove
kabineta i poslove Gradske uprave

Sarajevo, septembar 2022. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 26. stav 1. tačka 2. i tačka 18. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva, na __. sjednici održanoj __. __.2022. godine, donijelo je

(Prijedlog)

**ODLUKU
O USLOVIMA I NAČINU DODJELE
„ŠESTOAPRILSKE NAGRADE GRADA SARAJEVA“**

POGLAVLJE I – OPĆE ODREDBE

Član 1.

(Predmet Odluke)

Ovom odlukom određuju se uslovi za dodjelu „Šestoaprilske nagrade Grada Sarajeva“ (u daljnjem tekstu: Nagrada), postupak i način dodjele Nagrade, organ koji provodi postupak po raspisanom Javnom pozivu i utvrđuje prijedlog dobitnika Nagrade, oblik i izgled Nagrade, i druga slična pitanja vezana za postupak, uslove i načine dodjele Nagrade.

Član 2.

(Gramatička terminologija)

Izrazi koji su, radi preglednosti, dati u jednom gramatičkom rodu, bez diskriminacije se odnose i na muškarce i na žene.

Član 3.

(Oblasti u kojima se Nagrada dodjeljuje)

- (1) Nagrada iz člana 1. ove odluke dodjeljuje se kao najviše društveno priznanje za značajna ostvarenja i značajne rezultate rada u oblastima:
- a) privrede
 - b) nauke i obrazovanja
 - c) kulture i umjetnosti
 - d) sporta
 - e) zdravstva i socijalne zaštite
 - f) drugim oblastima rada i stvaralaštva, bez obzira na godinu ostvarenja, a koji doprinose ukupnom unaprjeđenju, promociji i razvoju Grada Sarajeva, kao glavnog grada Bosne i Hercegovine i Federacije Bosne i Hercegovine

Član 4.

(Značajna ostvarenja)

Pod značajnim ostvarenjima, u smislu ove odluke, podrazumijeva se djelovanje i rezultati ostvareni u kontinuitetu koji se smatraju doprinosom razvoju odgovarajuće oblasti, u skladu s kriterijima uobičajenim za konkretnu oblast, a koja doprinose ukupnom razvoju, odnosno promociji Grada Sarajeva.

Član 5.

(Kriteriji)

- (1) Kriteriji za dodjelu nagrade su:
- a) **za pojedince i grupe**
 - 1) dobrotvorno, humanitarno, socijalno, edukativno i drugo djelovanje namijenjeno većem broju korisnika, građana Bosne i Hercegovine kojima su uskraćena politička, građanska ili ljudska

prava, socijalno isključenih, marginaliziranih ili ugroženih društvenih grupa unutar Bosne i Hercegovine, a putem kojih je Grad Sarajevo pozitivno promoviran;

- 2) donatorski, humanitarni i sponzorski portfolio za društveno-korisne aktivnosti;
- 3) izuzetan doprinos u odbrani države Bosne i Hercegovine
- 4) postizanje značajnih rezultata u oblasti nauke, obrazovanja, zdravstva, socijalne zaštite, kulture, sporta, amaterskog stvaralaštva i drugih društvenih djelatnosti ili najboljih rezultata u teorijskom i praktičnom radu na pojedinom području javnog djelovanja;
- 5) doprinos unaprjeđenju radnih procesa kreativnim radom ili inovacijama;
- 6) dobivanje domaćih i međunarodnih priznanja za vlastite inovacije;
- 7) objavljivanje, prikazivanje, izlaganje, izvođenje ili prezentovanje na neki drugi način vlastitih ostvarenja značajnih za širu zajednicu;
- 8) ugled i visoke moralne vrijednosti.

b) za pravna lica

- 1) društveno-odgovorno djelovanje u kontinuitetu, uz puno poštivanje zakonskih normi, prava radnika i dokazanu brigu za zajednicu;
- 2) upošljavanje većeg broja radnika;
- 3) ostvarivanje značajne dobiti u poslovanju;
- 4) vršenje znatnijih ulaganja u proširenje proizvodnih i drugih kapaciteta;
- 5) postizanje poslovnih uspjeha na nivou međunarodnih standarda;
- 6) najmanje pet godina postojanja i kontinuiranog djelovanja;
- 7) renome uzornog pravnog lica.

POGLAVLJE II – POSTUPAK DODJELE I IZUZEĆA

Član 6.

(Javni poziv)

- (1) Dodjela Nagrade vrši se objavljivanjem Javnog poziva za predlaganje kandidata za dodjelu Nagrade, a koji upućuje Odbor za dodjelu „Šestoaprilske nagrade“ (u daljnjem tekstu: Odbor), imenovan odlukom Gradskog vijeća Grada Sarajeva.
- (2) Javni poziv se objavljuje u sredstvima javnog informisanja i zvaničnoj web stranici Grada Sarajeva i ostaje otvoren 45 dana, računajući od dana posljednje objave.
- (3) Javni poziv će se putem nadležne Stručne službe za poslove Gradskog vijeća Grada Sarajeva biti dostavljen strukovnim udruženjima (Udruženje poslodavaca Federacije BiH, advokatska komora, Udruženje zdravstvenih radnika, kao i strukovnim sindikatima).

Član 7.

(Dobitnici Nagrade)

Nagrada se dodjeljuje:

- a) Pojedincu;
- b) Grupi (okupljenim pojedincima na realizaciji određenih poslova s rezultatima koji se mogu razmatrati u kandidaturi za dodjelu Nagrade kao značajna ostvarenja, odnosno značajni rezultati rada);
- c) Kolektivu (privrednom društvu, ustanovi, udruženju i drugom pravnom subjektu s područja Grada Sarajeva, kao i onom van područja Grada Sarajeva, ako se njihova ostvarenja, odnosno rezultati rada odnose na Grad Sarajevo).

Član 8.

(Izuzeća)

- (1) Nagrada se ne može dodijeliti organima uprave svih nivoa vlasti u Bosni i Hercegovini, izabranim funkcionerima, poslanicima, vijećnicima svih nivoa vlasti u Bosni i Hercegovini i njihovim srodnicima za vrijeme trajanja njihovog mandata, kao ni zaposlenima u organima uprave svih nivoa vlasti Bosne i Hercegovine za ostvarenja koja se odnose na djelovanje u okviru djelokruga posla koji vrše u organu uprave.
- (2) Nagrada se ne može dodijeliti ni kandidatima protiv kojih se vodi krivični postupak, kao ni kandidatima koji su osuđeni pravosnažnom odlukom nadležnog suda.

POGLAVLJE III – IZGLED, SADRŽAJ I TERMIN DODJELE NAGRADE

Član 9.

(Izgled Nagrade – Povelja)

- (1) Nagrada se dodjeljuje u obliku Povelje, uz novčani iznos koji Odlukom utvrđuje Gradsko vijeće Grada Sarajeva, na prijedlog Administrativne komisije.
- (2) Kada se Nagrada dodjeljuje grupi, svaki član grupe dobiva Povelju.
- (3) Novčani dio nagrade iz stava 1. ovog člana raspoređuje se članovima grupe na jednake dijelove.

Član 10.

(Sadržaj Povelje)

- (1) Povelja iz člana 8. stav 1. i 2. Odluke sadrži sljedeći tekst: „BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, GRAD SARAJEVO“, sa suhim grbom Grada Sarajeva, centriranim na vrhu stranice formata A3.
- (2) Ispod teksta iz stava 1. ovog člana, ispisuje se sljedeći tekst: „Na osnovu Odluke Gradskog vijeća Grada Sarajeva o dodjeli „Šestoaprilske nagrade Grada Sarajeva“, broj____, dodjeljuje se „ŠESTOAPRILSKA NAGRADA GRADA SARAJEVA“ (tekst na sredini Povelje), ime i prezime lica, odnosno imena članova grupe ili naziv kolektiva kojima se Nagrada dodjeljuje.
- (3) Ispod teksta iz stava 2. ovog člana, ispisuje se kratko obrazloženje, odnosno navodi oblast rada i stvaralaštva u kojoj je dobitnik Nagrade ostvario značajne rezultate.
- (4) U donjem lijevom uglu Povelje je oznaka datuma, mjesta i broja Odluke, a u donjem desnom uglu je potpis gradonačelnice Grada Sarajeva.
- (5) Uz Povelju se uručuje i Odluka Gradskog vijeća Grada Sarajeva o dodjeli „Šestoaprilske nagrade Grada Sarajeva“ za odgovarajuću godinu, kojom se utvrđuje vrsta i sadržaj Nagrade, dobitnik Nagrade, te naznaka da se Nagrada uručuje od strane gradonačelnice Grada Sarajeva i predsjedavajućeg Gradskog vijeća Grada Sarajeva, na svečanoj sjednici Gradskog vijeća.

Član 11.

(Ograničenja)

- (1) U jednoj godini može se dodijeliti najviše šest Nagrada, iz svake oblasti po jedna, bez obzira da li se radi o pojedinačnoj, grupnoj ili kolektivnoj Nagradi.
- (2) Nagrada se istom licu, iz člana 6. Odluke, može dodijeliti samo jedanput.

Član 12.

(Termin dodjele Nagrade)

- (1) Nagrada se dodjeljuje svake godine i uručuje 6. aprila na Svečanoj sjednici Gradskog vijeća.
- (2) Samo izuzetno, u slučajevima vanrednih nepredviđenih okolnosti, kao što su stanje elementarne i druge nesreće, i drugim sličnim nepredviđenim situacijama, Nagrade se mogu

uručiti u drugom terminu, o čemu odlučuje Kolegij Gradskog vijeća, na prijedlog predsjedavajućeg Gradskog vijeća.

- (3) Nagradu uručuje gradonačelnica Grada Sarajeva i predsjedavajući Gradskog vijeća Grada Sarajeva.

POGLAVLJE IV – PREDLAGANJE KANDIDATA I RAD ODBORA

Član 13.

(Predlaganje kandidata)

- (1) Pravo predlaganja kandidata za Nagradu imaju privredna društva, ustanove, udruženja građana, grupe od najmanje 200 građana i druga pravna lica sa područja Grada Sarajeva, kao i raniji dobitnici „Šestoaprilske nagrade Grada Sarajeva“.
- (2) Subjekti iz stava 1. ovog člana, nemaju pravo isticanja sopstvene kandidature za Nagradu.
- (3) Prijedlog iz stava 1. ovog člana podnosi najviši kolektivni organ upravljanja, skupština ili Upravni odbor, odlukom tih organa o podnošenju prijedloga kandidata za Nagradu, s tim da je uz prijedlog dužan dostaviti pismenu saglasnost kandidata da prihvata kandidaturu, jasno definisati oblast za koju se kandidat predlaže.
- (4) Kandidata za dodjelu Nagrade ne mogu predložiti upravljačke strukture pravnih i fizičkih lica sa kojima je interesno povezan.
- (5) Pravo predlaganja kandidata za Nagradu ima i gradonačelnica Grada Sarajeva.

Član 14.

(Sadržaj prijedloga)

- (1) Prijedlog iz stava 3. člana 12. Odluke dostavlja se u tri primjerka sa detaljnim podacima i obrazloženjem i potrebnom dokumentacijom.
- (2) Obrazloženje treba da sadrži podatke o kandidatu, ukupan radni opus i posebne zasluge u oblasti zbog kojih se kandidat predlaže za dodjelu Nagrade.

Član 15.

(Odbor)

- (1) Gradsko vijeće Grada Sarajeva imenuje Odbor iz člana 5. Odluke i to najkasnije na oktobarskoj sjednici Gradskog vijeća.
- (2) Odbor iz stava 1. ovog člana čini ukupno 13 članova, i to sedam članova Komisije za izbor i imenovanja Gradskog vijeća i šest članova iz reda istaknutih javnih djelatnika iz oblasti:
 - a) privrede;
 - b) nauke i obrazovanja,
 - c) kulture i umjetnosti;
 - d) sporta;
 - e) zdravlja i socijalne zaštite;
 - f) drugih oblasti rada i stvaralaštva, za koje se Nagrada dodjeljuje.
- (3) Članovi Odbora iz reda istaknutih javnih djelatnika mogu biti i raniji dobitni „Šestoaprilske nagrade Grada Sarajeva“.
- (4) Kolegij Gradskog vijeća Grada Sarajeva kandidira Komisiji za izbor i imenovanja kandidate za članove iz reda istaknutih javnih djelatnika iz prethodnog stava, vodeći računa o ravnopravnoj zastupljenosti oba spola.
- (5) Komisija za izbor i imenovanja utvrđuje prijedlog i upućuje ga Gradskom vijeću Grada Sarajeva na razmatranje i usvajanje.
- (6) Predsjedavajući i zamjenik predsjedavajućeg Odbora se biraju na prvoj sjednici Odbora.

- (7) Mandat članova Odbora iz reda istaknutih javnih djelatnika traje do okončanja postupka izbora laureata za tu godinu.

Član 16.

(Poslovnik o radu Odbora)

- (1) Odbor iz prethodnog člana ove odluke, na prvoj sjednici donosi Poslovnik kojim se uređuje način rada Odbora, a posebno se definiše tajnost rada Odbora i imena kandidata za dodjelu do donošenja konačne odluke Gradskog vijeća o dodjeli Nagrade.
- (2) Poslovníkom iz prethodnog stava ovog člana uredit će se i zajedničko razmatranje predloženih kandidata od strane članova Odbora, u dvije sjednice, prije procesa glasanja, kao i način glasanja Odbora bodovanjem u drugom ili trećem krugu, i to tako da kandidat koji ostvari minimalan broj bodova većine od ukupnog broja članova Odbora, dakle sedam članova Odbora, ne može biti predložen Gradskom vijeću na konačno odlučivanje.

Član 17.

(Nadležnost Odbora u pogledu prijedloga)

Ukoliko Odbor u toku postupka za dodjelu „Šestoaprilske nagrade Grada Sarajeva“ utvrdi da predloženi kandidat ispunjava uslove za neku drugu oblast, Odbor može predložiti da se o njegovoj kandidaturi glasa u drugoj oblasti.

Član 18.

(Postupak pred Odborom)

- (1) U prvom krugu, članovi Odbora glasanjem utvrđuju liste kandidata koji zadovoljavaju uslove propisane Odlukom i Javnim pozivom u pojedinačnim oblastima.
- (2) U drugom krugu glasanja Odbor primjenjuje način bodovanja preciznije utvrđen Poslovníkom o radu te Gradskom vijeću predlaže najmanje dva prvorangirana kandidata, ako ih je bilo dva ili više, u suprotnom jednog ukoliko je jedan kandidat dobio minimalan broj bodova većine od ukupnog broja članova Odbora ili ni jednog ukoliko kandidat nije dobio ni jedan bod.
- (3) Gradsko vijeće donosi konačnu Odluku tajnim glasanjem na sjednici Gradskog vijeća zatvorenoj za javnost.
- (4) Ukoliko je član Odbora na bilo koji način povezan sa predloženim kandidatima za dodjelu „Šestoaprilske nagrade Grada Sarajeva“, obavezan je izuzeti se prilikom glasanja.

Član 19.

(Postupak sa prijedlozima koji ne ispunjavaju uslove)

Ukoliko Odbor ocijeni da određeni prijedlog kandidata ne ispunjava uslove za dodjelu nagrade, Odbor može uputiti inicijativu prema ovlaštenim predlagačima, gradskim vijećnicima, gradonačelnici, da podnesu prijedlog za dodjelu drugog priznanja ili nagrade Grada Sarajeva, u skladu sa Odlukom o priznanjima i nagradi Grada Sarajeva.

Član 20.

(Tajnost u radu Odbora)

- (1) Članovi Odbora se obavezuju na tajnost svih podataka o kandidatima.
- (2) Članovi Odbora se obavezuju da neće davati izjave u medije ili preko društvenih mreža sve do zvanično upućenog prijedloga Gradskom vijeću Grada Sarajeva.
- (3) Član za kojeg se utvrdi da je prekršio obaveze iz stava 1. i stava 2. ovog člana, trajno se isključuje iz rada Odbora, o čemu odluku donosi Gradsko vijeće Grada Sarajeva i istovremeno imenuje drugog člana odbora umjesto isključenog člana.

Član 21.
(Naknada)

- (1) Članovi Odbora imaju pravo na naknadu.
- (2) Visina naknade iz stava 1. ovog člana utvrđuje se na isti način kao i za ostala radna tijela Gradskog vijeća, a na prijedlog Administrativne komisije Gradskog vijeća.

Član 22.
(Finansijska sredstva)

Sredstva za dodjeljivanje Nagrade, kao i sredstva za rad Odbora obezbjeđuju se u Budžetu Grada Sarajeva i Odluci o izvršenju Budžeta.

Član 23.
(Mandat članova Odbora)

Mandat članova Odbora prestaje usvajanjem izvještaja o radu Odbora od strane Gradskog vijeća Grada Sarajeva.

Član 24.
(Stručni i administrativni poslovi)

Stručne i administrativne poslove za potrebe Odbora, kao i evidencije o dodijeljenim Nagradama, vrši Stručna služba za poslove Gradskog vijeća Grada Sarajeva.

POGLAVLJE V – ODUZIMANJE NAGRADE I POSTHUMNA DODJELA

Član 25.
(Postupak oduzimanja Nagrade)

- (1) Nagrada koja se dodjeljuje pojedincu, odnosno grupi, može se oduzeti nakon dodjeljivanja iste.
- (2) Pod oduzimanjem Nagrade podrazumijeva se oduzimanje Povelje pojedincu, odnosno članu grupe.
- (3) Nagrada se oduzima ako je nagrađeno lice pravosnažnom sudskom presudom osuđeno od Međunarodnog suda za ratne zločine počinjene na teritoriji bivše Jugoslavije, ili koje je pravosnažnom sudskom presudom, od bilo kojeg suda sa područja Bosne i Hercegovine, osuđeno za krivično djelo protiv života i tijela na kaznu zatvora od najmanje godinu dana, protiv slobode i prava građana, protiv dostojanstva osobe i morala, protiv imovine, protiv pravosuđa, protiv službene i druge odgovorne dužnosti, protiv osnova društvenog uređenja i sigurnosti.
- (4) Nagrada se može oduzeti ako je nagrađeno lice pravosnažnom sudskom presudom osuđeno na kaznu zatvora preko tri godine ili težu kaznu, a ne radi se o krivičnom djelu iz prethodnog stava.

Član 26.
(Oduzimanje Nagrade)

- (1) O oduzimanju nagrade odlučuje Gradsko vijeće Grada Sarajeva.
- (2) Odluka o oduzimanju Nagrade objavljuje se u „Službenim novinama Kantona Sarajevo“ i sredstvima javnog informisanja, kao i na zvaničnoj web stranici Grada Sarajeva.

Član 27.

(Posthumna dodjela Nagrade)

Ukoliko priznanje, odnosno Nagrada nije uručena dobitniku za života, predaje se članovima uže porodice (bračni drug, djeca i roditelji) i o tome se izdaje potvrda.

POGLAVLJE VI – PRELAZNE I ZAVRŠNE ODREDBE

Član 28.

(Prestanak važenja dosadašnje Odluke)

Danom stupanja na snagu ove odluke prestaje da važi Odluka o uslovima i načinu dodjele „Šestoaprilske nagrade Grada Sarajeva“ („Službene novine Kantona Sarajevo“, broj 28/19).

Član 29.

(Stupanje na snagu Odluke)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Jasmin Ademović

Broj:
Sarajevo;

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. i tačka 18. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) kojima je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje, kao i da donosi odluke o priznanjima i nagradama Grada Sarajeva..

RAZLOZI DONOŠENJA

Programom rada Gradskog vijeća Grada Sarajeva za 2021. godinu, broj: 01-GV-02-1281/20 od 30.12.2020. godine, broj: 01-GV-02-195/21 od 24.02.2021. godine i broj: 01-GV-02-742/21 od 30.06.2021. godine, kao jedna od tema programirana je i tema – Nacrt Odluke o uslovima i načinu dodjele „Šestoaprilske nagrade Grada Sarajeva“.

Postupajući shodno naprijed utvrđenoj obavezi, a na osnovu prijedloga, primjedbi i sugestija datih kroz Izvještaje Odbora za dodjelu „Šestoaprilske nagrade Grada Sarajeva“ koje su dostavljene Stručnoj službi gradonačelnice Grada Sarajeva, i to:

- a) Izvještaj broj: 04-GV-02-363-1/20 od 09.03.2020. godine
- b) Izvještaj broj: 04-GV-02-424-1/20 od 16.03.2020. godine
- c) Izvještaj broj: 04-GV-02-229-2/21 od 05.03.2021. godine

sačinjen je Nacrt predmetne Odluke.

Gradsko vijeće Grada Sarajeva, na šestoj sjednici Gradskog vijeća održanoj 29.09.2021. godine, razmatralo je Nacrt predmetne Odluke i uputilo ga u javnu raspravu u trajanju od 60 dana sa utvrđenim subjektima javne rasprave: klubovi gradskih vijećnika, radna tijela Gradskog vijeća Grada Sarajeva i drugim subjektima koji iskazuju interes.

U periodu trajanja javne rasprave nije bilo primjedbi, prijedloga i sugestija na Nacrt Odluke, a što je predstavljalo i jedan od razloga da se sačeka određeni period sa utvrđivanjem Prijedloga Odluke. Nakon što se utvrdio Prijedlog Odluke i uputio na 15. sjednicu Gradskog vijeća Grada Sarajeva od 27.04.2022. godine isti je s ciljem utvrđivanja što kvalitetnijeg teksta Prijedloga Odluke povučen sa 15. sjednice Gradskog vijeća Grada Sarajeva.

Shodno navedenom, na sjednici Kolegija Gradskog vijeća Grada Sarajevo od 05.05.2022. godine, a o čemu je sačinjen i Zapisnik broj: 01-GV-02-799/22 od 05.05.2022., gradonačelnica Grada Sarajeva predložila je, da se u cilju izrade Prijedloga Odluke o uslovima i načinu dodjele „Šestoaprilske nagrade Grada Sarajeva“, formira radna grupa koju će činiti uposlenici Stručne službe za poslove Gradskog vijeća Grada Sarajeva i Stručne službe gradonačelnice Grada Sarajeva.

Primjenjujući odredbu člana 15. Odluke o organizaciji i djelokrugu organa uprave Grada Sarajeva („Službene novine Kantona Sarajevo“, br. 24/21 i 16/22), kojom je između ostalog, propisano da za izvršenje pojedinih složenijih poslova i zadataka gradonačelnica može formirati Komisije ili druga Radna tijela, gradonačelnica je Rješenjem broj: 01/14-04-6043/22 od 29.08. 2022. godine formirala Radnu grupu koja će raditi na pripremi Prijedloga Odluke koja će biti razmatran na sjednici Gradskog vijeća Grada Sarajeva 05.10.2022. godine. Radna grupa je, dana 02.09. 2022. godine, održala radni sastanak te je nakon konsultacija gradskih propisa, a naročito Poslovnika Gradskog vijeća Grada Sarajeva („Službene novine Kantona Sarajevo“, br. 28/09, 11/20 i 19/20) zauzela sljedeći stav:

1. Nije moguće vršiti bilo kakve normativne intervencije u tekstu Prijedloga Odluke o uslovima i načinu dodjele „Šestoaprilske nagrade Grada Sarajeva“, jer je prošao javnu raspravu, dakle ne mogu se dodavati novi članovi, brisati postojeći ili vršiti bilo kakva intervencija u tekst;

2. Poboljšanje teksta Prijedloga Odluke moguće je kroz amandmansku proceduru prema uputama gradonačelnice, kao ovlaštenog predlagača i prema ocjeni Radne grupe koju mora prije toga prihvatiti gradonačelnica kao predlagač, tako da će Radna grupa do 07.09.2022. godine uputiti Gradskom vijeću postojeći tekst Prijedloga Odluke u daljnju proceduru i na radna tijela, dok će se u međuvremenu poboljšati eventualni tekst Prijedloga Odluke kroz izradu Amandmana.

3. Radna grupa će sačiniti pisani tekst Amandmana u propisanoj formi najkasnije do 20.09.2022. godine te ih uputiti na saglasnost gradonačelnici.

4. Nakon konačne saglasnosti gradonačelnice, koja radi procedure mora stići najkasnije do 23.09.2022. godine Radnoj grupi, gradonačelnica će kao predlagač uputiti odmah Amandmane u proceduru na Gradsko vijeće, a najkasnije 26.09.2022. godine.

5. U slučaju potrebe i zahtjeva gradonačelnice, stavove Radne grupe i tekst Amandmana će predsjednica Radne grupe usmeno elaborirati gradonačelnici.

Uzimajući u obzir naprijed navedeno, Gradsko vijeće Grada Sarajeva donijelo je ovu Odluku.

FINASIJSKA SREDSTVA

Sredstva potrebna za realizaciju Odluke obezbjeđuju se u Budžetu Grada Sarajeva.